

13. august 2026

Inatsisartut ingerlatsinermut maleruagassaasa § 37 imm. 1 tunngavigalugu matumuuna ukunannga Naalakkersuisunut apeqquteqaateqarpunga.

Naalakkersuisunut apeqquteqaatit:

1. Suut tunngavigineqartarpat ullumikkut, nalilersorneqartillugu, Kalaallit Nunaata avataani Danmarkimilu ilinniakkat ilinniagaqarnersiuteqarnissamik akuerineqarsinnaasutut?
 - a. Qanoq aalajangerneqartarpat, suut ilinniarfiit aamma ilinniakkat ilinniakkanut, ilinniagaqarnersiuteqarsinnaatitaasut allattorsimaffiannut ilanngunneqarsinnaasutut?
 - b. Ilinniagaqartut sunik periarfissaqarpat immikkut ittumik ilinniagaqarnersiuteqarnissamik akuerineqarnissamut, ilinniagassatut kissaatigisaq allattorsimaffimmi akuerisaasumi ilaanngippat?
 - c. Sulisitsisut pisariaqartitaat qanoq akuutinneqassappat nalilersuinerni, ilinniakkat nutaat imaluunniit ilinniarfeqarfiit ilinniagaqarnersiuteqartitsisinnaanersut?
 - d. Naalakkersuisut qanoq nalilerpaat, ilinniagaq, allattorsimaffimmi akuerineqartumiinngitsoq, Kalaallit Nunaanni siunissami sulisussaqaqarnermut aammalu piginnaasanut immikkut ittunut pisariaqartinneqarnersut?
2. Kalaallit Nunaata avataani Danmarkimilu ilinniakkanut ilinniagaqarnersiuteqarnissamik immikkut ittumik qinnuteqaatit qassit ukiut tallimat kingulliit tiguneqarsimappat?
 - a. Immikkut ittumik akuerineqarnissamik qinnuteqaatini taakkunani qassit akuerineqarlutillu itigartinneqarsimappat?
 - b. Ilinniakkanut Kalaallit Nunaata avataani aamma Danmarkimi ilinniakkanut ilinniagaqarnersiuteqarnissamut itigartitaanermut pissutaasut nalinginnaanerpaat suuppat?
3. Naalakkersuisut ilinniagaqarnersiuteqartitsinissamut periarfissat qanoq nalilerpaat ilinniakkanut, Kalaallit Nunaata immikkut ittumik pisariaqartitaanut, assersuutigalugu nunaateqarneq, inuussutissanik sanaartornermi, timmisartukkut angallannermi, helikopterimik angallannermi aammalu inuussutissarsiutini immikkut ilisimasanik peqarnissamik pisariaqartitsisuni?
 - a. Piareersaataasumik oqaatsit pillugit pikkorissarnernut ilinniagaqarnersiuteqartitsinissaq Naalakkersuisut sunik periarfissaqarsoraat, oqaatsit pillugit pikkorissarneq pisariaqarpat nunami allami ilinniarnissamut tiguneqarnissamut apeqqutaalluni?
 - b. Timmisartortartutut ilinniarnernut ilinniagaqarnersiuteqartitsinissamut Naalakkersuisut suut eqqarsaatersuutigaat, tassani helikopterimik timmisartortartunngornissamut aammalu Kalaallit Nunaanni immikkut ittumik suliaqartarnerat eqqarsaatigalugit?



DEMOKRAATIT

4. Ilinniagarnersiuteqarnermut malittarisassat aamma nunaqavissunik amerlanernik ilinniartitsinissamut, ullumikkut avataanit tikisitanit ingerlanneqartunut ataqtigiinnerat Naalakkersuisut qanoq nalilerpaat?
5. Periarfissat suut Naalakkersuisut takusinnaavaat malittarisassat eqaannerulersinneqarsinnaanerannut, ilinniagaq Nunatsinni imaluunniit Danmarkimi ingerlanneqarsinnaanngikkaangat, kisiannili Kalaallit Nunaata pisariaqartitaanut naapertuuttumik nalilerneqarluni?
6. Aningaasatigut allaffissornikkullu suut kingunerussappat ilinniagaqarnersiutitut akuersissutit siammartinneqarpata Kalaallit Nunaata aamma Danmarkip avataani ilinniarnernut immikkut ittunut atuutinneqarsinnaanngorlugit?
7. Naalakkersuisut oqaluuserisamut soqutiginaatilinnik allanik paasissutissiisinnaanerlutik?

(Inatsisartunut ilaasortaq Ida Vahl, Demokraatit)

Tunngavilersuut

Immikkut ittunik ilisimasalinnik pisariaqartitsisunut sullissisussanik ilinniarsimasunik amerlanernik pisariaqartitsivugut. Inuussutissarsiutit pioreersut iluanni, inuussutissarsiutit periarfissat nutaat aammalu ullumikkut avataaniit aggersitanit suliffigineqarnerpaani.

Ilinniakkat ilaannut tunngatillugu ilinniagassatut neqeroorutit Kalaallit Nunaata aamma Danmarkip avataani inissisimasinnaapput. Assersuutigalugu ilinniagaasinnaapput nunani avannarlerni allani inissisimasut imaluunniit ilinniakkat pingaarutillit, maani nunatsinni tigussaasumik pisariaqartinneqartut. Taamaattoqartillugu pingaaruteqarpoq, ilinniagaqarnersiuteqarnermut malittarisassat ersarillutik, paasiuminarlutik aammalu nunatta sulisoqarnermi siunissami pisariaqartitaasa eqqaarsaatiginissaat.

Tassunga ilutigalugu pingaaruteqarpoq nassuiassallugu, sooq ilinniakkat aamma ilinniarfiit ilinniagaqarnersiutit piffiusinnaannginnersut, aammalu qanoq immikkut ittumik akuersissuteqarnermut periarfissat ulluinnarni atorineqarsut. Ilinniagaq inuiaqatigiitsinnut ineriartuutaasussaappat, ersarittariaqarpoq, ilinniartup suut periarfissarinerai, aammalu nalilersuineri suut eqqarsaatigineqarsimanersut.

Apeqquteqarmut siunertat taamaattumik ukuupput piviusorsioortumik tunngaveqarnissaq nalilersornissaanut, ilinniagaqarnersiuteqarnermut malittarisassat maannakkut atuuttut naammattumik eqaannerunersut piginnaasanut immikkut ittunut pisariaqartitsinerput naammattumik matussuserniarlugu, taamatuttaaq aningaasaqarnikkut, pitsaassutsimik qulakkeerinissaq allaffissornikkullu passukkuminarnissai eqqarsaatigalugit.

Apeqquteqaatima ullut suliffiusut qulit iluanni akineqarnissaat qilanaaraara.